



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tiryimym@aolima



tir yimym

TAPAK 8



Sorkari tamangba yimsü ajak kümzüksüla: Farooq Abdullah

Dravid'er jabaso Samit India U-19 squad nung züngoksemogo



VOL. XXI ISSUE NO. 319 (ADOK 319) DIMAPUR AMUNGNÜ (SUNDAY) RONGJUI (SEPTEMBER) 01, 2024 ₹ 5.00

COPU-i Multi-Level Car Parking yangluba semdang

Dimapur, August 31, 2024 (TYO): August 30, 2024 nü Committee on Public Undertakings (COPU) Chairman Imkong L. Imchen-i anir Committee züngsemtemi Kohima nung Multi-Level Car Parking (MLCP) building ana yangluba semdangogo.

Advisor Imkong aser züngsemtem- Advisor Hekani Jakhalu, MLA Dr. Neisatuo Mero, Advisor Sethrongkyu nung den Nagaland Legislative Assembly Secretariat nung ketdangsurtemi Old Medical Directorate aser Old NST, Kohima nung MLCP tesem ana "On-the-Spot Verification" ao.

Committee-i tesem ana semdangba sülen Department of Municipal Affairs kübok CEO, Kohima Smart City Development Ltd (KSCDL) semdang.

Old Medical Directorate (5

storey) nung MLCP ya Rs. 3121.90 lakhs endoka yanglur aser iba nung gari 150 anentetsü aser dokan 67 lapoktsü.

Old N.S.T (7 storey) nung MLCP ya Rs. 2878.10 lakhs endoka yanglur aser idakji gari 120 anentetsü aser dokan 16 lapoktsü.

KSCDL-i taküm October ita Kohima City Centre aser November ita Kohima Local Ground lapoktsü sentong lir ta Committee-i den osang lemsatop. Committee on Public Undertakings (COPU)-i MLCP projects ana yangluba nung temulung asüba metetdaksü aser iba mapa inyaker nem tenüngsang agütsü.

Sorkari terenlok mapa balala inyakba atema public-i tenüngsang agütsütsüla aser KSCDL projects kübok facilities timi benshitsüla ta COPU-isa metetdaksü.

Power department-i metetdaksür

Dimapur, August 31, 2024 (TYO): August 30, 2024 nü Transmission Division Mokokchungkübok 66/33KV, 10 MVA Power Transformer nung timtem ka adok ta Power department-i metetdaksü.

Iba ajanga Tuensang, Noklak aser Shamator district dangi power supply nung timtem ajurua lir aser department-i

akokba tashi iba khuret agientsü inyakdar ta parnokki ashi.

District asem dangi 5 MVA transformer nungi power supply agütsür aser 10 MVA Power Transformer meyagluzük tashi load sheddings alitsü. Anungji consumers-i koda masüba timtem arema atatsü mepishir ta Power department-i metetdaksüogo.

Arunachal police-i NSCN-IM züngsem 2 apu

Itanagar, August 31, 2024 (Agencies): Itanagar Capital Region Police-i Naharlagun nung telungpur ana aser overground worker ka puogo.

August 30, 2024 nikongdang nisung kari NSCN-IM züngsemtem ama public dang nungi tashiyim agi sen saruba osang angazük.

Iba mapa nung shilem agir ta temulung melemba nisung ka Innova gari ka nung mener oya angu. Iba jagi DIGP ICR Vijay Kumar, IPS lenisüba kübok police telok ka tenteta mapa inyak.

Iba telok nung SP Naharlagun Mihin Gambo, IPS, SDPO Naharlagun Paul Jerang, SDPO Yupia Radhe Obing, Inspector K. Dev, OC PS Naharlagun, parnok PSOs aser Naharlagun Police Station staff dena liasü.

Police telok jagi E-Sector, Naharlagun nung gariji soter mita repringdang Pangchau, Longding nung alir Sampho Wangsa (40) aser Narayanpur, Lakhimpur nungi overground

worker Chandan Bhuyan (35) na apu.

Tena dang asüngdangya asüdag Wangsa-i pa NSCN-IM züngsem ka aser Longding nung Pangchau aser Wakka area Revenue Incharge inyaker ta nangzük.

Longding nung alir Chopsai Pansa den külemi pai shishilembar dang nungi sen sarutsü atema aruba nangzük aser Wangsa-isa Pansa jenoka alidaki police anir aotsü mulunga agizük.

Pai ashiba nung ajemdaker police-i E-Sector, Naharlagun nung hotel ka mita aodang Chopsai Pansa (55) apu. Pa ya Chop, PO/PS Wakka, Longding nungi lir.

Pansa ya NSCN-IM nung Captain ka lir aser pa ket nung shishilembar dang nungi tashiyim agi meshiba Rs 3,40,000 aser cheque ana (Rs 20 lakh each) bena lia apu.

Iba dak sendakba nung Naharlagun Police Station nung FIR ka benokogo aser maneni bushisüngdang südar.

Kukiland meshia lungkak ait; CM Biren Singh anema ken o benoktsü akhanger



Imphal, August 31, 2024 (Agencies): Kuki-Zo nungeri Hoibarnü Manipur kübok tesem balala nung Kukiland state balaka meshia lungkak aitogo.

Kuki-Zo nung teimba ser aliba Churachandpur aser Kangpokpi district tem tongti ser lungkak aitba sentongtem agia liasü.

Manipur Chief Minister N Biren Singh-i jembiba ta audio tape ka prokshiba sülen tejashi nung Kuki Inpi aser Kuki Students' Organizations (KSO) dena Kuki-Zo teloktemi iba lungkak aitba sentong ayonga agi. Iba audio tape nung Kuki-Zo nung anema o aika jembiba lir saka tang tashi CM Biren Singh-i jembiba kulibo mengutet lir.

Kangpokpi nung lungkak aitertemi "Biren Singh led BJP Government ethnic cleansing

against the Kuki-Zo exposed," "Separate administration the only solution," aser "Tape of revelation" tezülubatem amer shilem agi.

Churachandpur nung lungkak aitertemi Kuki-Zo nung atema temeten meshiba den parnok lendong nungi jenbua alitsü atema state balaka tentetjang ta takhangba agütsü.

Naga volunteers-i tensa meraksadaksütsü atema lungkak aitertemi noktangka Kuki-Zo nung kari lung shia arua amokmerenba ajanga rara adoktsüsa aküm.

Senapati District Students Association (SDSA)-i Manipur nung kin o kin raraba nung tiyongsü nung dang lia arur.

Kuki-Zo nungeri iba rally ayongzükba atema sasar aser onok telongtet nung iba ama

sentong magidaksütsü. Iba sentong ajanga mepetmesü kar danga adokra tayongertemi tebilemtsü khuret abentsü ta SDSA-i metetdakja liasü.

Honibarnü Kuki-Zo nungeri lungkak aitba ajanga Manipur nung valley districts 5 nunga dokan aser shishilembadak ajak shibanga liasü.

Tanü Khwairambam Ima Keithel, Paona market aser Thangal market azüngazünga aküm.

Jiribam adena Imphal aser Silchar aser Dimapur o Imphal tsüngda inter-state transportation nung timtem adok. Külen Imphal nung shisaliok rejutem ajak shibang.

Maneni, valley district headquarters Bishnupur, Moirang, Thoubal aser Kakching nung kasa tensa ajurua liasü.

Assam assembly-i 'namaz break' agienba atema CM Sarma aitsür

New Delhi, August 31, 2024 (Agencies): Assam state assembly-i Muslim MLA temi namaz asütsü atema Hokolbarnü ghonda 2 break agütsüba anenba sülen BJP den tongti süa yaripertemi Assam Chief Minister Himanta Biswa Sarma aitsür.

Narendra Modi-i aniba NDA sorkar nung Nitish Kumar'er Janata Dal (United) aser Chirag Paswan'er Lok Janshakti Party (Ram Vilas) ajanga Assam sorkar lemtet atema ashishiteper. JD(U)-ibo iba ya tamangba yimsü inyaksangshi nung meinprongba ta shiogo aser iba ajanga maneni BJP atema tebilemtsü ka bentsür aruogo.

Constitution nung Preamble ajanga nisung ajaki pei tamangba yimsü aser inyaksangshi sülen anidaksü temeten lir ta jangjajangja shia lir. Constitution yanglurtemi linük nung nisung temeyoktep aliba bilema iba ya

yanglua yutsü JD(U) lennir K. C. Tyagi-i Assam sorkar lemtet anema ashi.

"Asenok ya nisung telemsa, kin telemsa aliba loktiliba ka lir. Sorkar ka ama asenoki nisung ajak indang inyaksangshi aser sobalibattem akhümtsübuttsüla. Asenoki tamangba yimsü maparen nung teka maittsüla" ta Tyagi-i ashi.

"Tekülem ki balala nung shiruru tenla agütsür aser NGOs aikati ibaji anema noktaker. Saka iba inyakyim manen aser manentsüla. Namaz ya tamangba yimsü inyakyim ka lir aser tamangba yimsü dak sendakba lemtettem magitsüla. Telok shingaiia timtem majurutsüsa sorkari inyaktsüla" ta LJP Delhi president Raju Tiwari-ia ashi.

"CM Sarma kübok Assam sorkari Hokolbarnü ghonda ana 'namaz' break agienba ajanga

mapang melalutsü ta shiogo. Ajisüaka iba ya nisung kar tamangba yimsü inyakyim dak sendaka lir anungji executive orders ajanga ibala inyakyim nung mekongshitsüla" ta JD(U) lennir Neeraj Kumar-i ashi.

"Assam nung Maa Kamakhya Temple ka lir aser iba nungi CM Sarma ya MLA ka lir. Shiruru tenla agütsüba sülen ang tekülem ki kishi lapoker. Nai Hokolbar sodi noktanger aser iba ajanga tajangzük alitsü ta ashir. Hindu sobaliba nung Maa Kamakhya Temple ya tongti shilem ka lir anungji nai Kamakhya Temple nung shiruru tenla agütsüba noktangtsü asü?" ta Neeraj Kumar-i CM Sarma dang asüngdangogo.

Assam CM-i Assam nung sensaktia agientsüba aser tzümetsüng noktangtsüba maparen nunga temulung agütsü tajungba ta JD(U) lennir Kumar-isa ashi.

Aboi nung RPI(A) züngsem ajak Congress nung aden

Dimapur, August 31, 2024 (TYO): 47 Aboi Assembly Constituency Unit nung RPI (A) (Republican Party of India - Athawale) president aser taoba RPI(A) Candidate nati anir züngsem ajaki Congress nung denogo.

RPI(A) unit president Nyeie Konyak aser RPI(A) candidate Wangka Konyak nati anir unit

züngsem ajaki Congress nung aden.

Congress Bhavan, Kohima nung PCC President & Member of Parliament (Lok Sabha) S Spongmeren Jamir, Working President, NPCC Shri. Khriedi Theunuo, NPCC Vice President Incharge of Mon District Shaboh Konyak aser tanga PCC ketdangpurtem lia parnokki

Congress züngsem aküm.

Nagaland Pradesh Congress Committee (NPCC)-i parnok ajak pelashishia agizüker aser Indian National Congress tamendakdak aser tangatetba nung ajemdaker parnok yimtenren wadang nung mera tasen nung ajemoka inyakba nung temoatsü lidakjang ta Communications Department, NPCC-i sangdong ka nung ashi.

Nagaland nung 'Ek Ped Maa Ke Naam' den Poshan Maah 2024 tenzük



Poshan Maah 2024 tenzükba sentong nung tangokba noksa angur.

Kohima, August 31 (TYO): Küm shia September ita nung Rashtriya Poshan Maah amonger; 2018 küm Ato kilonser Narendra Modi-i Poshan Abhiyaan tenzüksüba sülen states aser Union Territories/ Departments den senteper linük tesem ajaklen Poshan Maahs 6 takok ngua mongogo, ta ketdangsertemi metetdaksü.

Honibarnü Nagaland nung #Poshanmaah2024 tenzükogo aser Department of Social Welfare-i "Ek Ped Maa Ke Naam" campaign nung shilem agiogo.

Taküm June 5 nü World Environment Day anogomong nung Ato kilonser Modi-i #Plant4Mother tenzükja liasü. #Plant4mother campaign nükjiding ya global warming ajemdaksüba, mopung quality tajungba kümdaksüba aser alima tzü-mopung

liromedemdaksüba ajanga tarutsü putu nung alirtem atema alima tajungba kümdaksütsü asoshi lir.

Social Welfare Secretary, Martha Ritse leniba nung #Plant4Mother plantation mapatong inyak aser Olemjungla Aier, Project Director Poshan Abhiyaan, Joint Secretary Soc. Welfare, Smt. Bodeno S. Colo, Addl. Secy, Addl. Secy, Smt. Tosheli Zhimomi, Director Social Welfare den Directorate Officers, staff tem, SPMU Poshan Abhiyaan team, district Social Welfare aser Anganwadi Workers-ia shilem agia liasü.

State tesem ajaklen district, block aser Anganwadi Centers ajak nung District Social Welfare den Block officers aser Anganwadi workers-i #Plant4mother campaign nung shilem agi.

Mission Saksham

Anganwadi aser Poshan 2.0 kübok Suposhit Bharat nükjiding ataloktsü atema nija aser lokti level nung libaliro melenshitsu kanga tongtibang. Iba nükjiding nung rangloker küm shia September ita nung Rashtriya Poshan Maah amonger.

Rashtriya Poshan Abhiyaan, Department of Social Welfare, Nagaland-i Departments of Health & Family Welfare, Rural Development - NSRLM, School Education, AYUSH, Horticulture, Forest & Climate Change, Agriculture & Local administration den senteper September ita nung omen pongu nung ajemdaker #Poshanmaah2024 amongtsü; omen ponguji: Anaemia, Growth Monitoring, Complementary Feeding, Poshan Bhi Padhai Bhi aser Use of Technology for better Governance lir.

Longleng nung Sampling Tailor skill development training tenzük

Dimapur, August 31 (TYO): August 30 nü Eastern Nagaland nung lanurtem atema Sampling Tailor indang angati Skill Training tenzükogo; iba training ya Department of DUDA-i PPC Ward, Longleng nung August 30, 2024 nü tenzükja liasü.

B. Longai Phom ADC (Planning)-i training okila nung Asso. Pastor, H. Mongngoi-i training agitsüpurtem dang iba training ya kanga tongtibang anungji kanga nendaka angazüksüla, ta ayongzükba sülen meshiteta

sarasademja liasü. Taküm küm atema ministry-i trainees 100 agizükogo. Iba dak alia kasa tesem nungsa kobi melii "Pattern Master" ta ser lanur 100 atema angati training agütsütsü, ta ketdangsertemi metetdaksü.

Tesayurtem State Award 2024

State Level Teachers Award 2024 atema tsünglanglen agüja aliba tesayurtem shima lir. Tenüngtem ya 'order of merit' sasep nung masü.

| Sno | Name | Designation | School Name |
|-----|--------------------------------|----------------------------|--|
| 1 | KhrieliePaphino | Primary Teacher | Government Middle School, Pfuchama, Kohima |
| 2 | T. Chiye | Primary Teacher | Government Middle School, Sanglao, Noklak |
| 3 | L. YajaoKonyak | Assistant Teacher | East Wood School, Mon |
| 4 | T. SetsatsiSangtam | Primary Teacher | Government Primary School, Phoya A, Tuensang |
| 5 | T. AirongKonyak | Physical Education Teacher | Government Higher Secondary School, Mon |
| 6 | AvinoPeseyie | Graduate Teacher | Government Higher Secondary School, Chumuokedima |
| 7 | Alokananda Das | Assistant Teacher | Holy Cross Higher Secondary School, Dimapur |
| 8 | Z. Chimjiba | Assistant Teacher | St. Xavier Higher Secondary School, Shamator |
| 9 | Hanchulo James | Graduate Teacher | Government Middle School, Tesophenyu Upper, Tseminyu |
| 10 | Baleshwar Mahato | Graduate Teacher | Government Higher Secondary School, Tobu, Mon |
| 11 | PelenaPetetilhu | Post Graduate Teacher | John Government Higher Secondary School, Viswema, Kohima |
| 12 | Kekhrieneino Catherine Senotsu | Post Graduate Teacher | Rüzhühkrie Government Higher Secondary School, Kohima |
| 13 | Rongsenkhalaaonok | Assistant Teacher | Queen Mary Higher Secondary School, Mokokchung |
| 14 | Joseph K V | Senior Teacher | Government Higher Secondary School, Mon |

GPRN/NSCN-i Longang Konyak mangayimer

Dimapur, August 31, 2024 (TYO): August 28 nü Jharnapani nung gari lendong ka nung Longang Konyak, Kilonser (Khehoi Camp) asüba osang angashia onok aoksar aser temulung raksar ta GPRN/NSCN-i metetdaksüogo.

Pai tenzükja aruba atema pelar aser Naga linük atema pai

kanga jangrabangra aser bendanga agüja inyaka aruba bilemteter ta MIP sangdong ka nung ashi.

GPRN/NSCN-isa asür kibong den mangyim lemsateper aser Tulusangi nenok nem tashi aser tesünep agüjang ta sarasademtsür ta MIP-isa metetdaksü.

I. Panger Imchen-i züluba "Unveiling the truth" kaketsaya



Kohima Ao Baptist Arogo (KABA) Pastor O. Sashi Ozukum-i "Unveiling the truth" I. Panger Imchen-i züluba autobiography kaket sayaba noksa nung angur.

Dimapur August 31, 2024 (TYO): Kohima Ao Baptist Arogo (KABA) Pastor O. Sashi Ozukum-i "Unveiling the truth" ta ser by I. Panger Imchen-i züluba autobiography kaket sayatsüogo.

Honibarnü hotel de Oriental Grand, Kohima nung iba kaket sayatsü. Kaket zülur I. Panger Imchen ya Agriculture department nung retired Director lir aser pa ya Chungtia nunger.

Pai anogoshia züluba Diary nung ajemdaker iba kaket zülüogo. Pai züluba otsütem meyanglushii aser iba jagi kaket tenüngji "Unveiling the truth" lir ta Panger Imchen-i ashi.

Iba kaket nung shilem pezü

lemsar lir. Shilem ka pa Indian army operation mapang yimdak tanur asüandang, ka pa high school aser college mapang, ka Agriculture Department nung pa 2013 küm mapa nungi anisüng mangu tashi inyaka aruba aser shilem ka pa dak kongshiba kibong aser nisungtem indang lir.

Iba sentong nung mendenji Kohima Chungtia Fellowship incharge, Tiameren liasü aser Kohima Aliba Fellowship incharge Nukshirenla-i temoatsü meshia sarasadem.

Repalemzung Lkr. Publisher, Woods publishers-i kaket indang tatsüka lemsateper aser KABA pastor O. Sashi Ozukum-i meshiteta sayatsü.

Tsütuonuomia Khel Council-i tanur asüba atema tebilemtsü abener

Dimapur August 31, 2024 (TYO): August 28, 2024 nikongdang Tsütuonuomia kübok Vürie nung arishi küm 9 tanur tetsür ka taitü keta ser lia anguba atema aoksar aser temulung tip matemer ta Tsütuonuomia Khel Council, Kohima Village-i ashi.

"Tasür kibong den asükuhu lemsateper aser nür-i takoksa anguba atema temulung raksar. Tulusangi iba mapang nür nem tesünep agüjang ta onoki sarasademer" ta Tsütuonuomia Khel Council-i metetdaksüogo.

Tsütuonuomia Khel Council-isa ozüng amertem dang iba tatalokba jungjunga bushistingdang asütsü ayongzükogo.

Tanutsüla asüba yimya nung taitü keta lir anungji aibelenertem ozüng tapet agi merenshitsu ta parnokisa ashi.

Tsütuonuomia Khel nung ozüng alema inyakba magizüker aser kari danga inyakra ozüng tesashitiba agi merenshitsu ta Chairman K.Neibou Sekhose aser General Secretary

Thepfuzakib Suohu nati sangdong ka nung ashi.

Wokha nung DC office site tasenba nung süngdong aika temogo

Dimapur, August 31 (TYO): Ato kilonser Narendra Modi-i tenzüksüba "Plant4Mother" mesüra "EK Ped Ma Ke Nam" sentong nungita August 31, 2024 nü anepdang 7:00 ako nungi Wokha nung Deputy Commissioner's office site tasenba nung süngdong temogo.

Deputy Commissioner,

Wokha Vineet Kumar, IAS leniba nung süngdong tema liasü. Iba sentong nung District Forest Officer, Wokha, District Forest Office (DFO), District Welfare Office (DWO), AE, CAWD nungi staff tem aser DC Office staff temi shilem agi.

Parnoki süngdong tapu balala 300 dak tali tema liasü.



Gurugram, August 31, 2024: Gari lenmang majungba anema Gurugram nung nūburtemi Haryana sorkar anema longkak aitdang tangokba noksa nung angur.

Sorkari tamangba yimsü ajak kümzüktsüla: Farooq Abdullah

Srinagar, Luroi/August 31 (Agencies): India ya nisung tapu balala aika telongjem nung litetba linük ka lir aser sorkari tamangba yimsü ajak kümzüktsüla, ta Honibarnü National Conference (NC) Tir, Farooq Abdullah-i metetdaksü. Assam state Assembly nung Hokolbar anogotem nung sarasademsü atema Muslim nung MLA tem nem ghonda ana lezmükja aliba agienba sülen anogo ka lir taoba mapang Jammu & Kashmir nung chief minister, Farooq-i, kechi südir süaka ajak ya teti atema masü, aser mapang tetemsü nung melenshir, ta ashi. Hokolbarnü Assam chief minister, Himanta Biswa Sarma-i, state assembly nung Muslim nung MLA tem sarasademsü atema ghonda ana 'break' agütsüba ya joko malitsü, ta metetdaksü. Iba temzüng ya taruba

assembly senden nungi mapa kümä benoktsü. Farooq Abdullah-i, "Iba linük ya nūbur tapu aika telongjem nung litetba linük ta tetshir. Asenok yimsü ajak aser oshi ajak lir; Tamil Nadu süaka, Kashmir, Bengal mesüra Maharashtra mesüra state ajak. State ajak nung sobaliba balala lir, ibayongji India ya federal structure ka lir aser asenoki tamangba yimsü ajak kümzüktsüla," ta ashi. "Kodang mapang arudir ibaji melenshitsu. Ajakji teti atemabo masü. Tajung-a tanaben agitsü. Onoki parnok dang ashitsu, onok sorkar arudakjang. Item ama mapa teinyak ta onoki ashitsu," ta Abdullah-i ashi. Paisa, Jammu & Kashmir nung aliba nūburtemia yimsü balala amangertem ajak akhümtsübuttsüla aser kümzüktsüla, ta ashi. "Asenoki yimsü balala

amangertem ajakji anepalutsüla. Kodang asenoki parnok dang tajung inyakdir ibaji linük tesem ajak atema tajung asütsü," ta paisa ashi. NC tatong Tir aser Farooq'er jabaso Omar Abdullah-i, khen mapang ka nungbo Jamaat-e-Islami (JeI)-i elections ya 'memelaba ka' ta jembia liasü, ajisüaka tangbo parnok atema temelaba kümä election nung tokteper, ta jembiba o aija PDP tongti, Mehboba Mufti-i, Omar-i iba o jembiba atema ni sasa bilemstür, ta aitsü. Iba dak sendakba nung NC Tir, Farooq-i, "Ni la (Mufti) indang kecha mejembitsü. Tsüngremi la moajang. La la lenmang nung jajadakang saka linük kümzüktsü atema bilemstüla. Kati ka nem tai tongloktsütepba ajanga tajangzük kecha mangutsü. Lai iba lenmang nungi pilatsüla," ta ashi.

Election Commission-i Haryana nung election anogo atsülangtsüogo

New Delhi, August 31 (Agencies): Haryana nung assembly election October 1 nü agitsü liasü saka BJP-i election anogo atsülangtsü mepishiba sülen Honibarnü Election Commission-i October 5 nü ang election agitsü lemtetogo. J&K aser Haryana assembly elections naprongla votes October 8 nü azüngtsü. Bishnoi nungertem vote agütsüba temeden aser parnok sobaliba akhümtsüba election anogo atsülangter, kechiyong parnok akhidang nungi Guru Jambheshwar bilemteta Asoj Amavasya benjung amonger, ta Election Commission-i metetdaksü. "National Political Party tem, State Political Party tem aser All India Bishnoi Mahasabha-i, Bishnoi nungar aikati Asoj Amavasya benjung amongtsü atema Haryana nungi Rajasthan-i aotsü ta onok nem metetdakja liasü," ta Election Commission-i metetdaksü. Parnok Rajasthan-i benjungji amongi ora nisung aikati vote magütsütetsü aser voters ajema alitsü, anungji item ajakji shisadanga sülen Commission-i Haryana nung election October 1 nü agitsü alibaji October 5 tashi atsülangtsüogo, ta election commission-i metetdaksü.

Jammu and Kashmir nungbo election anogo memelenshir. J&K nung September 18, September 25 aser October 1 anogotem nung election agitsü. EC-i Haryana nung election anogo atsülangtsüba atema pelaba lemsatapa BJP lenir, Anil Vij-i, "Onoki Election Commission dang kanga pelar. Onoki mepishiba parnoki agizüka anogo melenshiogo," ta metetdaksü. BJPMP, Biplab Kumar Deb-ia, "Iba ya Election Commission teinyaktsü mapa lir. Bishnoi nungar tongti benjung aliba nung ajemdaker Election Commission-i election nung voters shilem aika alitsü nükjidong nung anogo melenshibaji onoki pelaa agizüker. State nung onoki ochishia inyakogo aser nūburtemi telemetba agitsü," ta metetdaksü. Ano külen taoba mapang Haryana Chief Minister aser Congress lenir, Bhupinder Singh Hooda-i, "Ibaji Election Commission indang temeden lir, parnoki anogo atsülangogo. Parnoki (BJP) Haryana nung tamakok angutsü, ta parnok sasa nangzükogo. Haryana sorkari Election Commission dangi shidi züluba mapang nunga ni 'BJP-i tamakok nangzükogo' ta jembia liasü," ta metetdaksü.

Haryana nung nashi shi achiba atema melung melemini nisung ka tepset

New Delhi, August 31 (Agencies): Haryana kübok Charkhi Dadri district nung West Bengal nungi Haryana-i arua aayanger kati nashishi chiogo, ta melung melemini nisung kari pa tepsetba sülen police-i nisung pongu pua lir, ta Honibarnü police-i metetdaksü. Police officer kati, West Bengal nungi Haryana-i arua alisangji Sabir Malik liasü; pai nashi shi achi ta melung melemini

August 27 nü nisung kari pa zükseta liasü. Nashi anükba telok ka nungi züngsemtem- Abhishek, Mohit, Ravinder, Kamaljit aser Sahil nungeri Malik dang parnok ket nung plastic bottle bendena lir, anungji na arung ta ashiba sülen parnoki pa dak azük. Nisung kari tiyongtsüi ia nokdangba sülen maneni par pongui Malik ji tanga tesem kati anir aoba sülen maneni azükba

ajanga pa zükset, ta police-i metetdaksü. Malik ya Charkhi Dadri district kübok Bandhra yim anasa liasü; pai anogo shia plastic pongdang tazüng aser merang tamajung shidena yoka liasü, ta police-i metetdaksü. Iba ken o nung nisung pongu puogo aser arrshi küm 18 tekübok tanur anata densema puogo, ta police-isa metetdaksü.



August 31, 2024 nü New Delhi nung National Conference of District Judiciary semzükba sentong nung Ato kilonser Narendra Modi aser Chief Justice of India, D.Y. Chandrachud na tangokba noksa nung angur.



Tawa Mumbai nung Shivaji Maharaj indang kūrakyanglu chirepba tatalokba anema August 31 nü Mumbai nung Maharashtra Youth Congress-i Chhatrapati Shivaji Maharaj indang kūrakyanglu anasa nokdaker longkak aitdang tangokba noksa nung angur.



बैंक ऑफ बड़ौदा
Bank of Baroda

KOHIMA BRANCH
National Highway 61,
Kohima, Nagaland- 797001
Email: kohima@bankofbaroda.co.in

GARI AYOKTSÜ

Bank of Baroda, Kohima Branch-i Smti. Sentila Jamir atema finance sütsüba gari/Equipment sen apur dang nungi puogo aser tayoktsü atema yua lir.

Iba gari alizüktsü janrartemi gariji rebrangdangtsü aser gari indang osang tejangja meteltsü atema tsunglanglen sign süa alir den tongteprateptsü akok. Offer letter denji külemi Earnest Money Deposit (EMD) ama gari atema **Rs. 14,000/- (Rupees Fourteen Thousand Only)** refundable/adjustable Banker's Cheque/DD alitsüla.

Gari alizüktsü janrartemi offer letter ji sealed envelope ka nung "Quotation for purchase of vehicle No. NL-01/TA-0392" aser tsunglanglen shia aliba gari tenung agütsütsüla aser kasaji **30.09.2024** anogo nikongdang 4:00 ako tashi nung tsunglanglen sign süa alir nem agütsütsüla. Sealed quotations ji Bank of Baroda, Kohima Branch premises nung **30.09.2024** anogo nikongdang 5:00 ako nung offer letters agüja alirtem lia lapoktsü.

Takok angur bidder-i shia aliba jenjangji quotation lapokba anogo nungi tenzüka working days 05 (Five) tsungda ajak agütsütsüla mesüra Branch Head-i mapang atsülangtsüba tashi nung agütsütsüla. Yamaji mesüra pai agütsüba EMD ji mangutsü aser gariji idangjisa ayoktsü. Gari/Equipment ji "Kong aliar yamaji" ayoktsü aser Bank-i latelba reserved price dang nungi tajemba agi mayoktsü.

Kuli kecha makai offers agizüktsü mesüra magizüktsü atema tsunglanglen sign süa alir dak temeden lir. Gariji Bank indang business anogotem aser mapa inyakba mapang nung rebrangtetsü akok.

| Sl.No. | Vehicle Make and Description | Reserve Price |
|--------|---|----------------|
| 1 | MARUTI ALTO STD (NL-01/TA-0392) Engine No.: F8DN6252835 Chassis No.: MA3EUA61S00F00656 Year of Manufacture: 08/2019 | Rs. 1,40,000/- |

Date: 01.09.2024
Place: Kohima

Branch Head
Bank of Baroda, Kohima Branch



TIR YIMYIM YIMOBILEM (EDITORIAL)

DIMAPUR AMUNGNÜ, SEPTEMBER (RONGJUI) 01, 2024

Asen jakdang Tsüngrem aor

Tsüngremi kodanga asenok kija tensa tia ka ajurui meyoker. Akhidang, Israel nunger anügdang mepet aser aonung mi tongshi agi aniba amato, tanüa asenok Tsüngrem chirtem jakdang Pa aor aser asenok den teti Pa dena lir. Kodanga asenoki Tsüngrem anir maor mesüra asenoki pa manüker saka Paiang asenok anir aser anüker. Asenokibo asenok takok anguba mapang mesüra lendong ajuruba mapang, asenok den Tsüngrem mali ama bilemtsüa akok. Ajisüaka, asenoki ajuruba tensa tia ajak nung Pa asenok dang tama orr atar. Aji oda, Mark 14 : 28 nung Yisui ashir, " Ni shia arur külen, nenok dang tama ni Galilee-i aotsü." Tetezü, asenok maodangyongi asenok aotsüba tesem nung Pa alitsü. Asenok den teti Tsüngrem dena aliba dang masü saka asenok nüngdak tesem kati maodangyongi Pa tama orr asenok asoshi lenmang renemtsütsüba maongka aser temoatsüji kanga tulu lir. Tenügsang Ken 139 nung ashir, " nü tanüla nungi ni koleni aotsü ? mesüra nü tsügdang nungi ni koleni ajentsü ? Ni anüng temaleni tura, na yangji lir; kü yipten Sheol nung yanglura, ajiang, na yangji lir. Ni anepdang tashikang tener aser tzüym tatembang nung oa lira, oda idakjia nü teka agi ni anitsü, aser nü teka tachiji agi ni amettsü." Tanü ita petinui atur meimchirtemi yangjibo Tsüngrem mali ama bilemtsüa akok mesüra tzüym taroktiba nungbo Tsüngrem mali ama bilemtsüa akok, ajisüaka David chubai ashir, Tsüngrem tanülaji item ajak nungji lir, asenok ajentsü makok aser Tsüngrem tanüla malidakji mali. Ibaji asenok asoshi tasü aittsü aser temulung süngzüksü o lir. Yisui Pa kangki nung masüdag, Pa sür külen nütsüngtem tetsübu nung jenshijenponga timtema senzütsü ta meteta liasü, anungji Pa masüdagyongi Pai parnok dang kechi koma tensa ajurudir ajuruaka aser kong lidir liaka, Pa parnok dang tama orr alitsü ta temulunglemtsü aser tasü aittsü o shia liasü. Tenyartem mapang nunga, Yihuda nungertemi Paul sayutsüngiba anema apusoba mapang, kaonung mangdang ka nung Kibubai Paul dang ashi, " Tetsübu, ajemajema melii jembijen jembiang, kechiaser ni nü den lir, shiangaia nü dak mazüksü aser nü dak tamajung mebeshitsü, kechiyong iba yimti nung kü nübor jenti lir." T.Mapa 18:9. Tanü na kanga tsübuseta mesüra shisaboluseta alitsüa akok, ajisüaka Tenyar Paul dang ashiba kasa Kibuba Tsüngremi ashir, na tetsübu, ni nü den lir, na koleni odir, ni nü dang tama aotsü. Pai nü tensa tijai meteta dang lir aser Pai mapang shitak - shitak nung nü nüngdakji agütsütsü. Na aolen Tsüngrem malitsüba tesem kecha mali, tesem ajak nung Yisui na yaritsü ata dang lir. Asenok tasütsü mapang agi atongdanga, kecha tetsübuttsü mali kechiaser Pa asen jakdang asenok talidak renemtsütsü asoshi oa lir. Asenok Tsüngrem chirtem asünung, asenok dang tama asenok aotsüba tesem ajak nung Tsüngremi mapa inyakdagi ta amangdi. Asenok tensa tia ajak nung Pai asenok len anitsü. Asenoki nisung kar ajurutsü shisabolua bilemer asü ? mesüra asenoki asen chirnurtem aotsüba lenmang indang shisabolua bilemer asü ? mesüra asen apuani inyakba mapa nung tsübuja bilemer ? Tsüngremi ashir, tetsübu, ni nü den lir, tasü dang itang. (T.Mapa 23:11). Tsüngrem dak amangertem asoshi Tsüngrem tenangzükbaji ibaji lir. Tsüngremi asenok dang, tetsübu, ni nü den lir ta shitakmonga asenok tamakok angu tsübuja kechiba alitsü ? Tsüngremi tetsübu ta shitakmonga kechiba asenok shirang majungtsü ama tsübuja alitsü ? Tsüngremi tetsübu ta shitakmonga kechiba asenok tasütsü tsübuja alitsü ? Tsüngremi ashir, tetsübu, kechiyong alima ya mesama tashi alima tatem tashi Pa asenok den alitsü. Atangji, asenok den Tsüngrem dena lir, ibaji meteta alitsübaji asenok asoshi shi aser tanüla ajak asoshi kanga tongtibang asütsü.

OLEMSABANG

RONGSEN MASÜ TENÜNG TAJUNGANG SHIMDI

- L. Kika Pongener.

Tenüng tajung ya koba amala dang ajar ? Tenüng tajungji aika dang lir...Alima aser nubur asoshi mapa tajung inyakba, sorkar, yimden, arogo, mungdang aser loktiliba tenzükba nung nuburi tamang katettsüsa, temulung lemtettsüsa inyakba. Talisa, rongsen ketdangsuba mapa nung, Tsüngremi temulung achitsüsa aser nuburi tamang katettsüsa ochishia inyakba...Yamala dang tenüng tajung ta ajatsü akok. Sen ajangzüksü mechi, nuburi tetla-tetshitsüsa, mesüra tenüng menuktsüsa inyakdang nungibo, asen dak nuburi tamang katettsüsa aser tatishitsü tajung agitsüsa ochishia inyakba-ang tajungba. Pai/lai-bo nungloktsüba mapa ajak nung teti ochishia inyaker...ta tangari tenüng tajung agütsütsüsa inyakba-ang tajungba. Rongsen aika ajangzükba dang nungibo, Tsüngrem'er maongka tilaka anguba-ang kanga agia tajungba. Tsüngrem o-i ashir, "Tenüng tajungji senti mozü dang tajungba" (Sayu-7:1) Senti mozüji...Turonem tajung adokdaksüba mozü (Scent) aser taneptsü anguba mozü (Medicine) asütsü akok. Item ama senti mozü dang nungia, tenüng tajung-jiang kanga agi tajungba. Asen nem nungloktsüba mapa ajak nung tenüng tajung angutsüsa indang-indanga, ochishia, meruk-meruka inyakba-ang tajungba. Yimden, arogo, mungdang aser loktiliba mapa ajak nung, asen dak tangari temulung lemtettsüsa, tamang katettsüsa aser tatishitsü tajung agitsüsa ochishia inyakba/tenzükbasa ajak dang tajungtiba. Asen yangkü asüngtsü indang mebilemi alima/nubur ajangtsü indang bilema inyaktsüla. Na aser ni, aseni tenzükba yimden, arogo, mungdang aser loktiliba nung teronem tajung adokdaksür, lokti shiranga aliba aneptsür aser lokti raksa-a aliba yanglur ka asütsüla. Ajisuaka, na aser ni, aseni tenzükba lokti timtemdaksür, petsa-perongdaksür, telemsa adokdaksür aser teraksatsür ka masütsüla.

Laishiba nung...Rongsen tulu dang nungibo tenüng tajungang shimtsüla ta ashiba ya...Talisa, Aotsür Aor atema kanga tongtipang tangazüksü lesson ka asütsü. Kechiyong tanü Aotsür Aor tenzükba yimden, arogo, mungdang aser loktiliba ajak nung ketdangsuba mapa reprangdangra, teimba ka ochimashi agi sunga lir. Election arura tangar kin dang nungi Aotsür Aor-i balaka sen nung tenuk kanga yoker. Senyong pei temeden Vote ayokba ya Aotsür Aor-i tangar kin dang nungi kanga talila yokteper. Tesasatsüka, Aotsür Aor teimba kati arogo aser mungdang tenzükba mapa nunga, tenüng tajung dang nungibo sen/rongsen temeimba lir. Yimden yimsusuba mapa nunga, tenüng tajung nem masü sen/supokrem nem amokbangdaksür. Sorkar tenzükba mapa nunga tenüng tajung nem masü sen/supokrem nem kokdaksür. Loktiliba balala tenzükba mapa nunga sen/supokrem nem anidaksür. Tangar-jibo oda yutsür...Tsüngrem tenzükkerbo, sen meimba nungibo jenbua lir...ta nuburtemibo kangasa yimlar....Saka kanga tesasatsüka, Tsüngrem tenzükertema karbo sen/rongsen nung mettsüdaker alangba angudang nuburtem kanga sungmanger...!!! Ajak dang alia, kangasa tesasatsüka, tanü asen lima nung Khristar arogo aika nung rongsen ketdangsuba mapa nung, nuburi temulung melemtettsüsa, tamang makatettsüsa ketdangsuba inyakba otsü/osang angashidang nubur aika kanga sungmanger...!!! Ano kanga tesasatsüka...asen lima nung yimden, arogo aser lokti meyong rongsen agi, pei nija jurila meyong rongsen amai kibur küma, ketdangsuba amshiba angudang kanga aoksar....!!!

Tanü putu nung tamanger tajung aikati, arogo aser mungdang mapa nung tenzükbaji, sen tajangzük angulen mapa ka amai bilema tenzükba, aser ketdangsuba mapa inyaktsü nungloktsübaji sen aatsü lenmang tajung ka amai angatetba tenzükker karbo alitsü akok. Tenyartem mapang nunga iba amaji aibelena sayuba tiyazü tesayur aser tamanger kar liasü sudi. Yongji Tenyar Paul-i Timoti dangi züluba shiti nung yamai shia angur..."Tamajung, temulung malem, temulung memeruk, ochi maka nisungtem.....Parnoki Tsüngrem tsübubaji tajangzük angulen ta bilemer" (1 Timoti-6:5)...ta shia angur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ao Baptist Arogo Shillong 3 buba Men's Fellowship agi



Ao Baptist Arogo Shillong-i Shillong nung alir Aor teburtem longjema tanela tsütsü tashi itdaksütsü atema "Men's Fellowship" tenzuka lir. August 31 nü parnok telongjem sentong nung agiba noksa ka yangi angur (Shillong, August 31, 2024)

Shillong, August 31 (TYO):

Ao Baptist Arogo Shillong-i 3 buba Men's Fellowship August 31, 2024 nü ayongzüka Holy Cross Father's Brookdene, Shillong nung ka-a tembangogo.

Iba sentong Omen "The Role of men in Re-strengthening Family" (Kibong Tashi itshiba nung Tebur Shilem) nungi Rev. Vermuriyi Vadeo, Pastor, Naga Christian Fellowship Shillong (NCFS) jaoka, Temeshi Lai Tazüngkunem 6:1-9 nungi ajemdaker Tsüngrem O lemsatepa liasü.

Pai Tsüngrem osang abenba nung, "Kibuba Tsüngremi Pai mezüja shimteta Israel kintem dang Pai melaba ozüng tangazütsü kisung asoshi masü saka tashi anga-a benschüsü melaba indang aser ibai tashi anga-a benshiba ajanga temoatsü agütsüba, mesüra parnok sentokra atakatem ajuruba indang ashi.

Paisa, Israel nüburtemi Tsüngremi meimba ama par Shema sarasadem nung kanga ajang-ajanga ametba, telemtetba ajak asoshi parnok

temolungjangji tongtibangtiba sütaktsüba aser iba ajanga parnok temolungjang ajaki Tsüngrem meimba indang kuli agütsüba indang lemsatep. Yamaji, Tsüngremi shimteta nüburtemi Tsüngremi temelaba ozüng, tongtibangsa tebu ka ajanga pei kibong sayua kibong rangpen aniba indang nendaka sangoktsü.

Paisa, tanü asen tendak kanga tesusatsüka tebutemi pei kibong mesayutetba indang, tebu kati pei teinyaktsü shitak meinyaktetba, kibok aika nung kibong tekülem ayonga magitetbatem indang sasaset lemsatep. Aji asü nung tanü tebutemi pei teinyaktsü tim meinyakba, züba-züba aliba ajanga tanü soeta asüba tatalokbatem, school züngtur anenba mesüra mapa tamajung aika ibala kibong nungi adokba lemsatep. Kodang kibongji anokshidir alima samar aser kibong nungji tebu ka maliba, tebu kati pei teinyaktsü shilem meinyakba ajanga institutions sädaktsüba aser alima meyangertetba indang kangasa

süoki ia, tanü asen tendakbo asenok tebutemi kanga Tsüngrem nem bendanga agüja, Teyanglur dang shisatsü aser tashi meshia asen teinyaktsü shilem ajak angateta asen Kibong anitsü aser alimaji taküm aliba, tajung sempetba tepor tajung lima ka sädaktsüdi, ta Tsüngrem osang abeneri ayongzüka liasü.

Iba sentong Mr. Impang Jamir (MLCU)-i leni ania liasü, Rev. Dr. Meyu Changkiri, sannüker-i Devotion Tenüngsang Ken 1 nungi ajemdaker bendanga agütsü mapang agia liasü, Lokti Pelatepba (recreation) mapang Mr. Immanuchet Kichu-i ania saya ka agia temoatsü agi.

Tatamsa, Dr. T. Temsunungsang-i Experience sharing aser discussion ania Loktiji Group asem (3) lemsar group discussions agi. Group shia nungi experience sharing aser findings bendena Lokti den lemsatep. Tatenertem ajak temoatsü ngua iba sentong takok ngua tembang.

Chhattisgarh nung pastor ka tasü mang aremstü temelaba magütsü

August 31, 2024: India nung Chhattisgarh state kübok Bastar district nung Khristan pastor ka ajungbena temelungjang tashidak agi asü; pastor tasü mangji aremstü atema yimdaklirtemi kinüngertem nem temelaba magütsü, ta International Christian Concern (ICC)-i metetdaksü.

Yimdaklirtemi pastor Manju'er kinüngertem dang nenoki Khristan yimsü toktsü nung ang aser senchi agütsü nung ang tasü mangji aremstü atema temelaba agütsütsü, ta metetdaksü.

Pastor Manju ya Khristantem temeden atema ola adokba lenir ka liasü. Pai yimtsüng ana nung Arogo balala ana nung sannükba mapa inyaka liasü.

Pa kinüngtsü tena jabaso ana aser jala ka sosema lir. August 28, 2024 nü pastor

Manju ajungbena temelungjang tashidak agi asü. Pa temang nung timtem adokba sülen kinüngertem hospital-i anir aotsü renem saka kobi melii asü.

Tasüngnep (August 29) par kinüngertem Arogo nung züngsemtem teyari agia tasü mangji aremstü tebilemba liasü.

Pastor nem akhüm agütsütsü aser asüpila sentong agütsü atema tesem balala nungi pastor 10 shi yimdak jagi arua liasü, ajisüaka yimdaklirtemi tasü mangji yimdak meremdaksütsü ta metetdaksü.

Manju'er kinüngertem yimdaklirtem dang tasü mang aremstü atema temelaba agüjang, ta mepishi, ajisüaka yimdaklirtem jagi parnok dang nenoki Khristan yimsü toktsür akhi yimsü dangi meyiptsüla aser senchi 200,000 agütsü nung

ang yimdak tasü mangji aremstü atema temelaba agütsütsü, ta metetdaksü.

Yimdak rongrong adokba meteta police tongti ketdangser ka aru, saka pai-a yimdaklirtemji ang pusema liasü. Parnoki pastor ajak dang yim toktsür oadokang ta tuyua liasü.

Pastor tem jagi police tongti dang, linük temzüng kübok senso ajak nem tamangba yimsü temeden agüja lir aser pei yimdak tasü mang aremstü atema temeden lir ta ashi.

Ajisüaka police ketdangser jagi, yimdaklirtemi yimdak aliba temzüng kübok alitsüla ta shia pastor ajakji yimdak nungi meindoka liasü.

Joko pastor Manju'er kinüngertem pusemer shinga maliba agi pastor kinüngtsü aser chirnurtemi akhi yimsü dak sendakba yimya nung pastor tasü mangji arem.

ANOGO ABEN TSÜNGREM DEN

MANENI SARASADEMANG

Maneni sarasademang.

~ I Tesalonika 5:17

Alima nung tashi tulutibaji sarasadem ya lir. Anüng, ali aser tzüyim nung amshitsü hatir tesashi balala aika liaka itemjibo mapang aser tesem tasazük ka asoshi dang lir. Saka sarasademibo kotak menden tashi atonger. Sarasadem tashi ajanga dang kija, kibong aser alima ajunga asoshi yimjung, tepela, tesünüp, takok aser temoatsütem bener arur, sarasadem ajanga dang lendong timtem nungi kümzüker, tanüptsü angur, tanüla kümzüker, temenen tongpang akoker. Yamaji sarasadem agi ajak melenshidaktsür.

Tenyar Pauli Tesalonika nung aliba amangbapurtem dang alima nung tatsüka alidang ajak dang akümtsüba, meimtepba, putepba, aremzüka, temajung melen tamajung magütsü, kati ka taoba ta aria bilema yaritepa tia tensa ajak nung Tsüngrem nem tenüngsang agüja alitsü indang ajungshiba angur. Tanü Yisu dak amangertem itemi benshia lilasang koda temoatsü süla. Nai/ni saksalema temulungjang taroktiba agi maneni sarasadem nung dang Tsüngrem O-i melaba amaji mapa agi benschitetsü. Shirnoki maneni sarasadem Tsüngremi mangashi-i malitsü.

Tsüngremi aseni sarasademba langzüba kuli tajung bener Pa tenüng sanga lidi.

Burkina Faso nung Islamic teloki ita 3 tsüngda Khristan 100 tepset

August 31, 2024: Burkina Faso nung Islamic kiralongrartem tesüiba ita asem tsüngda Khristan 100 shi tepsetogo aser Khristan aika puer ogo.

Taoba Amongnüa Burkina Faso kübok Sanaba nung Islamic kiralongrartem Khristan 26 shi puer oa Tenla ki ka nung parnok terok-zü ranga tepset.

Khristan charity telok Aid to the Church in Need (ACN)-i ashiba agi, Mali den arrtsülen Nouna Diocese anasa Islamic kiralongrartem amakba ajanga tetsür-tanurtem teimba ser nisung 5,000 shi jena oa Nouna yimti nung jenokogo.

"Teburtemjibo kong aliar memetet. Parnok jena oadok asü atsüka ali asü tepsetar onoki memetet," ta Arogoi ACN nem metetdaksü.

Tesüiba ita ishika tsüngda Burkina Faso nung Catholic aser Protestant Tenla kitem den külemi akhi yimsü amangertem tekülem ki aika rongdoktsüogo.

"Zekuy nung catechist kati motorcycle aika ola angashiba sülen pa leniba nung züngsemtem aremleni jena ao," ta Arogoi ACN nem metetdaksü.

"Kiralongrartem jagi Tenla kiji raksatsü aser Tenla kidang sabang raksatsütsü merang, jara nung noksa yanglusatsü," ta ACN-isa metetdaksü.

Tesüiba küm ka tsüngda ACN-i Burkina Faso nung Arogo indang project 76 shi nungita yariba den külemi Khristantem timtem pungbatsütsü atema mapa tajung aika inyaktsüogo.

Tesüiba küm 9 tashi Burkina Faso nung ozüng alema inyaker telok balalai nüburtem nem timtem agüja arudar.

2015 küm Islamic telok aser Burkina Faso sorkar na tsüngda rara tenzuka liasü. Al-Oaeda aser ISIS ama kiralongrar teloktem den sendaktepa aliba teloktemi timtem kanga agütsür.

Tesüiba küm 9 tsüngda nisung 10,000 dak tema tepsetogo aser nisung million aika jenshiogo.

**AO OSHI ANGAZÜKDAK:
TANÜ ANGAZÜKTSÜBA OJANG**



Tamatari

(adv) shisarama, meblemte (nonplussed, forgetfulness)

* Nisung kanga aoksaba agi tamataria akümer.

Tamatoktsü

(adj) amara tebulu, odaori (absentminded)

* Asenok tain kümerbo mapa ajak tamatoksü dang kümadoker.

OLONG PAITEP # 6911

15x15 crossword grid with numbers 1-17 indicating starting positions for clues.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Mepupet - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6910 TELANGZÜBA

TIPIEN :

- 2. Tesasa, 5. Sen, 6. Warok,
7. Kaset, 8. Temin, 11. Süjak,
13. Talak, 14. Sadok, 15. Ola,
16. Amajok.

LANGTSÜNGLEN :

- 1. Suwar, 2. Teroto, 3. Satan,
4. Jenti, 7. Kinük, 9. Okadak,
10. Atala, 11. Salem, 12. Saket.



TAMANGER SENTEP KA NUNG OLAKATI JEMBIR

- Ola : Sentepa alirtem , Yisu yakta arutsü, saka Pa maru tsüngda nenok ajak nem temoatsü ka ka agütsüner, anungji pei aginüba nokdaka shiang ?
Minister : Nibo tang atoka aliba menden nung ya masü tashi mendakjangma,
Tesayur : Nibo tazü Lima kanung tesayur inyaker, saka joining report agütsürbo tanü tashi küm 20buba ATM ki dak alema kecha mangu alir, ano yamajidang pension tongdakjangma,
Laishir : Ni theology zünger küm 5buba kazür, anungji imlibilema nia town Arogo tuluka nung inyaksü moajangma,
Contractor : Ni inyaka aliba mapa ya noklang nung 25 agidang inyaker tanungbajibo ozü nem moajangma,
Yimsüsür : Tang ni tekolaksür yimsüsüa aliba ya metitemi yujangma,
Sensaker : Aya, Yisu yakta arutsü asürji nia Pa den aotsü leman lapokjangma,
Ola: O ! Tamangertem !!!!!!!
Lilir: I. Kilang Ajem, Indisen, Dimapur.

**Tinsukia nung prangpong-
injang aika angu**

Dibrugarh, August 31, 2024

(Agencies): Honibarnü Assam kübok Tinsukia nung aliba Upper Dehing Reserve Forest nung sepaitemi prangpong-injang aika nguogo.

"Tinsukia nung police-i Heckler & Koch SMG, 130 rounds Ammunition, 2 magazines aser KG PEK explosive powder ngutetogo. Iba ya Assam-Arunachal arrtsülen kanga inyaksangshiba telungpur telok ka meyong asütsü ta temulung malemer" ta Assam DGP GP Singh-i ashi.

"Iba mapang police teloki prangpong-injang aika ngutet. Prangpong-injang ya telungur telok kar indang asütsü ama temulung melemi bilemer" ta pai ashi.

"Onoki Assam- Arunachal Pradesh arrtsülen mapang talangka mapa inyaka arur. Telungpur telok kar nung over-ground workers-i sepaitem dang atsüka prangpong-injangtem miima ayu asütsü akok ta bilemer" ta SP Dilip-isa ashi.

Tawa tu Tinsukia district nungsa sepaitemi arem ka nung prangpong-injang aika nguteta liasü.

Assam kübok Tinsukia-i Arunachal Pradesh den arrtsütepa lir aser iba jagi telungpur teloktei arem ajanga senzür. Telungpurtemi ozüng alema mapa inyakba sülen Myanmar-i ayongayonga jena oteter.

**SÜR KÜM ANA (2) AJUNGBA
MENUNGRA BILEMTETER**



ASÜR MARMANGYANG
Tasüba Anogo: 01.09.2022

Pungmang ka amai dang bilemer saka asangsang nung nai onok toktsür oer tanü aki küm ana (2) abensar, saka onok mulungjang nung na teti alir.

Ne temeim mapatem, nu sayu O tajung, ne tamang Sarasadem, akümüli piyong kangki lenmang nung jajaba item bilemtetdang onok molung süngzüker.

Tanü na onok den meliaka asenok ajak künü anogo Kotak nung ajurutsü Sarasadema atar.

**~ Ne temeim kinungtsü, chimurtem, semchirtem,
anukapang/kinungtsürtem.**



**OFFICE OF THE
LONGSA EAGLE CLUB**

TENÜNGSANG AGÜTSÜR

Wb. Taliwapang Longkumer aser Dr. Ademla Tinu na jabaso Wb. Temshimeren Longkumer tawa NPSC-i ketdangsüa agiba, Personnel & Administrative Reforms Department kübok EAC (CI-I Gazetted Junior Grade) jenjang nguteta asen Eagle Club sanger aser senso sanger ajak nem khonang nungsang tulu bener arutsüba asoshi kanga pelaba lemsateper.

Ne taküm alima tenzüka wadang nung shisatsü aser anema aliba moajang ta Club sanger sarasadem.

**Sd/-
Talingangshi
President**



**Sd/-
Talikala
Gen. Secretary**

Churachandpur nung BJP lennir ki rongdoktsü

Imphal, August 31, 2024

(Agencies): Manipur kübok Churachandpur district nung Honibarnep mejangjatetba nisung kari BJP lennir ka ki rongdoktsü.

Churachandpur distric kübok Peniel yimtsüng nung BJP Manipur state unit Michael Lamjathang Haokip'er ki, dokan aser tanga kiojen nung mi senoktsü.

Iba lendong nung sen lakh aika rongsen samatsüogo aser tawa Haokip anema tasembenbuba mapa inyakogo.

Chief Minister N Biren Singh-i iba tatalokba khukhua aitsüba metetdaksüogo. "Ozü nübertem mapang shia amakba aser peace rally tenüng amer amakba ya shisabulua bilemtsüba inyakyim ka lir. Iba

ama mapa ya magizüktsü aser aibelenertem merenshitsu aser ketdangsürtemi security peria magütsüba anema mapa inyaksü" ta pai ashi.

Haokip-i local TV channel ka nung shilem agidang tebilemba aika lemsatepa liasü aser iba atema pa amaker asütsü akok ta osang angazüker.

Churachandpur Deputy Commissioner-i Superintendent of Police dang Michael Lamjathang Haokip'er ki rongdoktsüba osang metetdaksüogo.

Deputy Commissioner-isa SP dangi züluba shidi nung iba tatalokba atema bushisüngdang asütsü aser tekaratiba nung report ka agütsütsü shiogo.

Peniel yimtsüng nung par

tsürabur ki amakba atema temulung raksar. Iba ya "ultra-Kuki supremacists and extremist groups" ajanga inyak ta BJP Manipur Pradesh spokesperson Haokip-i ashi.

Tsürabur mesüra kinungertem dak teka sangshiba ya tim masü. Iba amai atalok yonga ni temeten, ochi aser timi inyaksü nangzüksü, ta pai ashi.

August 25 anogo nunga mejangjaba nisung kari Peniel yimtsüng nung Phatthei In nung kasa ki amak.

Manipur sasep nung ketdangsübaren balaka meshiba MLA 10 rongnung 3-i "Kuki-Zo" ta masü saka kin tenüng shitak amshia ajatsü jembiba sülen Churachandpur nung Haokip'er ki amak.

Gossaigaon nung nisung 6000 temai UPPL nung aden

Guwahati, August 31, 2024

(Agencies): 2025 Bodoland Territorial Council (BTC) elections agitsü jakdang United People's Party Liberal (UPPL)-i August 31 nü Srirampur, Gossaigaon nung public rally tuluka ayongzüka agiogo.

Iba sentong nung nisung aika aden aser Bodoland People's Front (BPF) o Congress den tanga telok balala nungi nisung.6,000 temai UPPL nung züngsem aküm.

Iba sentong nung Bodoland Territorial Region (BTR) Chief Promod Boro aden.

Tesüiba küm pezü tsüngda UPPL lenisüba kübok BTC nung terenlok jenti bener aruogo ta Boro den central lennirtemi jembia arur.

Tanü UPPL nung adener shia nem Bodo Aronai aser party flag kaka agüja pelashishia agizük.

US military & Iraq nungger sepai senteper ISIL pur 15 tepset



Iraq security forces den senteper Iraq anüolen meita aoba mapang ISIL (ISIS) telungpur 15 tepset.

Washington, Luroi/August 31 (Agencies): United States military-i ashiba agi, Iraq security forces den senteper Iraq anüolen meita aoba mapang ISIL (ISIS) telungpur 15 tepsetogo.

Brehostibarnü khatpeba mapang US nungger sepai tenet yiru, ta US Central Command (CENTCOM)-i Honibarnü sangdong ka ajanga metetdaksü.

Linük nung US aser Iraq na joint security mission ka asoshi sensaksema aliba mapang tang iba meita aoba sentong ya ayongzüka agiogo.

Telungpurtem yagi, prangbong balala, grenades aser explosive 'suicide' belt tem bener liasü, ta CENTCOM-isa X ajanga metetdaksü.

Iba lendong nung civilian ka danga asü masü iba indang osang kecha magütsü.

Meita aoba mapang US nungger sepai pongu yiru aser ana alanger yirua liasü, ta US military ketdangsür kati Associated Press news agency dang ashi. "Sepaitem ajak lendong nungi pilar lir," ta ketdangsür yagisa shisem.

"ISIS ya, iba tesem, onok indang allies tem aser ozü linük asoshi asoshi maneni amokmeren ka lir," ta CENTCOM-i ashiba agi, US-i

maneni item kiralongrartem samatsütsü asoshi Iraq densema tanga linüktem den longjemer inyaksü.

Kasa mapang nung Iraq military-i ashiba agi, "anüng ajanga kiralongrartem jenoka aliba tesemtem amakba sülen airborne operation ka benoka inyaka liasü.

"Asürtem rongnung ISIL lenirtem densema liasü. Parnok tejenokdak, prangbong injang aser logistical support tem raksatsüogo, explosive belts tem takok ngua detonate sütsüogo aser tongtibang kuli kaketem, identification papers aser communication device tem ngutetogo," ta kasa sangdong ajanga metetdaksü.

Iraq aser Syria naprongla nung US-i aniba coalition indang mission anogo tembangsü lia tawa atsülangshiogo.

Reuters news agency-i ashiba agi, iba onük dak sendakba nung sensaksem November ita US tir election magi tashi nungbo tembanga jembishinü mesütetsü.

Iraq nung US nungger sepai 2,500 amenoka lir. ISIL den raratsü atema Syria nung US nungger sepai 900 shi amenoka lir.

Gaza nung rara tenzüker aliba

mapang Iraq aser Syria naprongla nung Coalition force tem drone aser rocket amshia aiben maka arudar, aser Iran den sendaka aliba telungpur teloktem Middle East ajunga nung iba rara nung densemogo.

Iba ita tetenzüklen Iraq nung military base ka amakba sülen US nungger sepai pongu tashi yirua liasü.

October ita nungi February ita tashi nung Iran den sendaktepa aliba telok shirnok dang Iraq nung Islamic Resistance ta ajar parnoki Iraq aser Syria nung US nungger sepaitem amenoka aliba tesemtem drone amshia aiben maka arudar.

2014 küm ISIL pur kanga kara renloka aoba mapang parnoki Iraq aser Syria na nung tesem tulu ka atsünger liasü.

US-i anir linük 80 dak temai telok ka tetet aser prnoki iba kiralongrar telok ya 2017 küm Iraq nungi aser 2019 küm Syria nungi mintoka liasü.

Ajisüaka kiralongrartem kinük nung aliba tesemtem nung maneni jenoka lir aser item tesemtem nungi parnoki tesem balala maka arudar. Iba den ISIL den sendaka aliba teloktem linük balala nung tesem balala amakba iba telok yagi nangzüka arudar.

Philippines aser China nati kati ka dak tai tongloktsü

Manila, Luroi/August 31 (Agencies): South China Sea nung mangatettep adoker aliba tesem ka nung rong tsüktepba atema China aser Philippines napronglai kati ka dak tai tongloktsüogo.

China indang coastguard-i Honibarnü ashiba agi, Philippine indang rong ka ozüing alema Sabina Shoal nung anener aliba kati China indang rong dak tsükoktsü. Kasa mapang nung Philippine coastguard-i ashiba agi, China nungger rong kati Manila indang rong ka dak asa tsükoktsü.

Ajisüaka rong tsüktepba mapang nisung yiruba osangbo kecha mali.

Linük ana tsüngda mangatettep adoker aliba Sabina Shoal ya Philippines indang asetkong Palawan nung km140 aser China kübok Hainan asetkong nungi km12000 pilar lir.

China indang coastguard

otongdar Liu Dejun-i ashiba agi, parnok rongshiba anema jenjang tapet agitsü aser linük territorial sovereignty aser maritime temedentem aser tejangrabtem kümzüka ayutsü atema jenjang tapet agitsü.

Kasa mapang nung Philippines coastguard otongdar Jay Tarriela-i ashiba agi, China indang coastguard-i, collision regulations sentoka toktsür lendong atoktsüsa jenjang agia liasü.

Osangbenertem den sensaksema mapang pai ashiba agi, China-i lendong ataloktsüsa jenjang agi aser iba ajanga teraksatsüba adok. Ajisüaka pai iba dak alaka osang talila magütsü.

Iba shoal ya Philippines indang 200-nautical mile (370km) exclusive economic zone kübok lir. Iba shoal ya Second Thomas Shoal nung garrison ka dangi osettsüt balala bener otsüba mapang Philippine resupply missions atema

tanenzükdak tongtibang tesem ka lir.

Taoba hopta-a rong ana tsüktepba sülen tang ano linük ana indang rong tsüktepogo.

June ita China nungger coastguard tem den mangatettep adokba mapang Philippines nungger ka temeyong rangtoka liasü.

China-i South China Sea ya timba parnok meyong ta ashir, aser iba ajanga parnok Philippines, Brunei, Malaysia, Taiwan aser Vietnam nungger den mangatettep adoka arudar.

Iba tzüyim nung totzü aser natural gas kanga angur aser iba den ango aputsüa kanga tajung lir. Iba den küm shia iba tesem ajanga USD trillion 3 alang shishilembateper.

2016 küm Permanent Court of Arbitration-i, China-i iba tzüyim parnok meyong ta ashiba ya ozüing alema lir ta ashi, ajisüaka Beijing-i iba obendang magizüki liasü.

SANGDONGER

India Government aser Federal Government Nagaland tsüngda ceasefire agreement koba Nagaland Baptist Churches Council-i anepalua 6 September 1965 nung yanglua tang tashi arudagi, iba anogo mong bilemteta taküma Ao Arogo aser yimtsüng nung Putu menden ajak nung anepdang 6:00 am nungi tenzüka iba yimjung maneni otettsü Tsüngrem dangi sarasadem yokdi ta ayongzüker.

KOKNALIM

President
NNC Ao Region.

Russia-i Kharkiv tesem amak; nisung 6 tepset

Kyiv, Luroi/August 31 dak sendakba nung (Agencies): Russia nungger sepaitemi Ukraine kübok Kharkiv yimti amakba sülen arishi küm 14 tain aiür chanu ka densema nisung trok tepsetogo aser nisung aika yirutsüogo, ta Ukraine nungger ketdangsürtemi metetdaksü.

"Linük atsüngertemi asayaba moapu ka nung tanur ka tepset," ta Kharkiv mayor Ihor Terekhov-i Telegram messaging app ajanga metetdaksü.

Ano 12-storey apartment block ka kong mi atoka liasü, iba kidang nisung asem tepset, ta paisa shisem.

"Tia maka asür nisung trok jungogo," ta Kharkiv regional Governor Oleg Synegubov-i iba tesem amakba sülen mapang tatsüka lir metetdaksü.

Asürtem rongnung arishi küm 14 tain aiür chanu ka densema lir, ta Interior Minister Igor Klymenko-i ashi.

Paisa, iba lendong nung nisung 55 yiruogo, ta metetdaksü.

Iba tesem indang video ka Ukraine tir Volodymyr Zelenskyy indang chief of staff Andriy Yermak-i lemsatepba nung nisung aliba ki ka indang temaba takdang nungi mokozü aser mi adokba nguogo.

"Russia nungertemi ano civilian tem makogo," ta Yermak-i Telegram ajanga ashi.

Kharkiv ya Ukraine nung yimti tulutiba rongnung tanabuba lir, aser iba yimti temeket ya Russia nungertemi bomb tesashitem amshia kanga mejungi maka arudar.

Rara tenzüka sülen Russia nungger sepaitemi Kharkiv yimti atsüngtsü merang saka parnoki takok monguteti mintok. Maneni parnoki May ita nungi Kharkiv tesem amak tenzüka liasü.

"Iba kiralongrar inyakyim ya nokdangtsü asoshi onok indang partner temi telemteba tesashi agitsü nungdaker," ta Zelenskyy-i ashi.

"Onoki long-range missile tem nungdaker," ta pai ashi. Kyiv-i joko mapang talangka parnok nem anüolen aliba linüktem nung yangluba missile tem Russia litsü nung amshitsü atema tenokdangba agütsür aliba agintsütsü khanga arudar.

"Ukraine atema air defence

mulungteper aliba benoka inyaksü nungdaker. Iba ya nisung taküm kümzüksü asoshi lir," ta pai shisem.

Taoba mapang Kharkiv kidanger Sumy tesem Russia-i amakba sülen nisung ana asü aser nisung ti tashi yirua liasü, ta local ketdangsürtemi metetdaksü.

Kremlin-i, Russia nungger sepaitemi Ukraine nung civilian infrastructure tem dak rangloker mamaker ta shia arudar.

Hokolbarnü Russia-i ashiba agi, parnoki Ukraine anütoklen yimtsüng asem atsüngogo.

Russia indang defence ministry-i Telegram ajanga ashiba agi, sepaitemi Ukraine kübok Donetsk, Luhansk aser Kharkiv tesem nung yimtsüng kar atsüngogo.

Moscow-i, Pokrovsk dak rangloker maka arudar, aser Kyiv-i ashiba agi, iba tesem nung rara kanga saka kümogo.

"Pokrovsk len tensa tamajungba lir. Tsükchirtemi onok sepaitem indang defence rakpoktsü meranger," ta Ukraine inadng commander-in-chief Oleksandr Syrskii-i Hokolbarnü ashi.

Paisa, Ukraine nungertemi Russia kübok Kursk tesem maneni maka odar, ta ashi. Ukraine-i ashiba agi, parnoki iba hopta tetenzüklen arrtsü nung yimtsüng 100 atsüngogo.

Kasa mapang nung European Union defence minister temi ashiba, Ukraine nungger sepaitem atema bloc training Ukraine litsü nung masü saka iba anasa tesem ka nung agitsüla, ta EU foreign policy chief Josep Borrell-i ashi.

Brussels nung minister tem senden amenba sülen Borrell-i, EU indang training mission kübok küm tatem tashi nungbo Ukraine nungger sepai 75,000 nem training agütsütsü mulungtepogo, ta ashi. Parnoki tang tashi nung sepai 60,000 nem training agütsür lir.

Estonia, France aser Sweden densema EU linüktem aikati Ukraine nung sepaitem nem training agütsütsü pusema arudar, saka Hungary densema tanga linük kari iba jenjang agiba ajanga rara tamajungba küma aotsü akok ta bilemer.

US Open: Djokovic tasembuba round nung Popyrin-i tsükdaktsü



US Open tebur kija asaya tasembuba round nung Hokolbarnü Alexei Popyrin-i 6-4, 6-4, 2-6, 6-4 agi Novak Djokovic akokba sülen salemba noksa nung angur.

Luroi/August 31, 2024

(Agencies): Tang asaya aliba US Open tebur kija asaya tasembuba round nung Hokolbarnü Alexei Popyrin-i set pezü asayaba sülen Novak Djokovic tsükdaktsüogo. Novak küm 18buba nung tang mezüingbuba US Open nung takaratiba tsükogo.

Arishi küm 37 tain Djokovic shibai US Open pezüben koka lir, pa Australia nung world No 28 asayar yagi 6-4, 6-4, 2-6, 6-4 agi koka liasü. Pa otsüsütsüsa Grand Slam title 25buba abentsü asoshi meranga asaya liasü.

Asaya nung Djokovic-i taiba mapang pa asayaba ama masü double faults 14 aser unforced errors 49 mena liasü, aser iba

asaya nung tamakok anguba tetezü pa 2017 küm sülen tang mezüingbuba season ka nung Grand Slam title ka danga mebeni tembangtsü.

Australia Open nung pa Jannik Sinner-i tsükdaktsü aser iba sülen French Open aser Wimbledon final nung pa Carlos Alcaraz-i tsükdakja liasü.

Australian Open semi-finals nung pa tsükdaktsüba sülen Sinner-i iba asayamung akok aser Djokovic ajateta world number one asayar aküm.

Kasa mapang nung Djokovic temekok nung timtem aliba ajanga French Open quarter final asayatsü lia asayamung nung masayatsü telemtetba agia liasü.

Hokolbarnü Djokovic tsükba

tetezü 2002 küm sülen tang mezüingbuba Grand Slam ka danga Djokovic, Rafael Nadal aser asaya nungi anener alisang Roger Federer nungeri makoktsü.

Brehostibarnü tebur kija asaya tanabuba round nung Alcaraz tsükatokba sülen Serbia nung asayar ya-a tsükogo.

Kasa asayamung tebur kija asaya nung Frances Tiafoe-i set pongu kanga toktepa asayaba sülen Ben Shelton kokogo.

Iba asaya ya Tiafoe-i 4-6, 7-5, 6-7 (5/7), 6-4, 6-3 agi akok aser pa round pezübuba nung Australia nung asayar Alexei Popyrin den asayatsü.

Asaya nung Shelton-i ace 23 ao, saka Tiafoe-i break points 21 tashi nguteta asaya aser pongu nungbo takok ngua liasü.

Bihar kübok Rajgir nung tetsür Asian Champions Trophy asayatsü



Luroi/August 31, 2024

(Agencies): Taruba Women's Asian Champions Trophy hockey tournament, Bihar kübok Rajgir yimti nung November 11 nungi 20 tashi asayatsü, ta Hockey India-i sangdong ka ajanga metetdaksü.

Iba asayamung ya Hockey India aser Bihar sorkar na longjemer ayongzüka asayatsü, koba tawa yanglushir aliba Rajgir Hockey Stadium nung asayatsü.

Taoba küm Hockey Jharkhand-i ayongzüka Ranchi nung Women's Asian Champions Trophy kanga takok ngua ayongzüka asayaogo, koba India-i koka liasü.

Defending champions India

dak alaka iba asayamung nung reigning Olympic silver medallists China, Japan, Korea, Malaysia aser Thailand nungeria iba asayamung nung shilem agitsü imlar.

Iba asayamung nung shilem agitsü aliba team tem pelashishia agizüka Bihar Chief Minister Nitish Kumar-i, "8buba Women's Asian Champions Trophy ayongzüka asayatsü asoshi Bihar sorkari teyari agütsütsü aliba pelashishia sangdonger. Iba asayamung nung shilem agitsü aliba international team tem pelashishia jaoker," ta ashi.

"Iba asayamung nung shilem agitsü atema hockey team tem, ketdangsurtem aser fan tem

ajaki ozü nüburtemi parnok pelashishia agizükba jangradema agizüktsü imlar, aser iba asayamung takokma nung asayatsü atema onoki takokba tashi inyaktsü," ta paisa ashi.

Kasa mapang nung Asian Hockey Federation tir Dato Fumio Ogura-i, "taoba küm India nung tetsür aser tebur Asian Champions Trophy takok ngua ayongzüka asayaba sülen Hockey India-i taküma iba asayamung ayongzüka asayatsü atema khuret abenba atema kanga pelar," ta ashi.

"Rajgir, Bihar nung iba asayamung ya taoba küm Ranchi, Jharkhand nung takok ngua asayaba ama asayatetsü imlar," ta paisa shisem.

Hockey India tir Dilip Tirkey-i, "Hokey asaya atema iba ya otsüsütsü ka asütsü, kechiyong tang mezüingbuba international hockey asayamung ka Bihar nung asayatsü lir. Iba asayamung ayongzüka asayatsü atema maongka agütsüba atema Asian Hockey Federation (AHF) aser Bihar sorkar dang kanga pelar," ta ashi.

Sancho loan nung oa Chelsea nung denogo

Luroi/August 31, 2024
(Agencies): Chelsea-i Manchester United winger Jadon Sancho season ka atema loan nung anirigo.

Tenangzüktepa nung Chelsea-i taruba summer England nung asayar ya pound million 20 nungi 25 tsüingda agi alizüktsü lenmang lapoka yuogo.

Sancho ya United puri 2021 küm July ita Germany club Borussia Dortmund nungi pound million 73 agi alizüka liasü.

Pa season asem asayaba mapang asaya 83 nung shilem agi, saka United coach Erik ten Hag den mangatetep adokba sülen pa first team nungi pilar training agia liasü.

Pa January ita ano Dortmund-i loan nung oa aden aser lemluwa United-i meyipa aru, ajisüaka season tasenba nung United pur Premier League asaya anaprongla nung pa masayadaksü.

Pa England team nungi 23 ben asayar lir aser tatemsa 2021 küm asaya liasü. 2022 küm Qatar nung World Cup aser 2024 küm Euro atema pa England team nung meshim.

Jadon Sancho, Manchester United pur pre-season tour

nungbo pa team nung densema liasü.

Kasa mapang nung Chelsea defender Trevoh Chalobah-a Crystal Palace nungi season ka asayatsü atema loan nung ogo.

Chelsea pur United States nung oa pre-season tour asayaba mapang arishi küm 25 tain ya team nung maliasü, aser pa tang club toktsür aotsü atema temelaba agütsüogo.

Maneni pa taküm PL nung Chelsea pur asaya anaprongla atema coach Enzo Maresca-i meshim.

Chalobah Crystal Palace-i aoba osang ya Honibar anepdangang sangdong saka tenangzüktepbabo Hokolbar aonung 11 ako nung transfer window meshibang tsüingda yanglur liasü.

"Ni Crystal Palace amala club ka nung adenba atema kanga pelar. Ni squad nung asayar karbo meteta lir aser parnok den asayatsü yongya atar," ta pai ashi.

Taoba season pa Mauricio Pochettino lenisüba nung Chelsea nungi asaya 17 nung asayaogo. Pa 2021 küm Thomas Tuchel kübok mezüingbuba club nungi asaya liasü.

Dravid'er jabaso Samit India U-19 squad nung züngoksemogo


Luroi/August 31, 2024

(Agencies): Taoba mapang India captain aser head coach Rahul Dravid'er jabaso Samit Dravid Australia den ODI asem aser four-day match ana asayatsü aliba atema India U-19 squad nung züngoksemogo. 50 over asaya ya Puducherry nung asayatsü aser four-day match ya Chennai nung asayatsü

Arishi küm 18 tain all-rounder yagi tawa Maharaja T20 KSCA tournament nung six tajung ka azünba atema ajaki jembia arudar. Mysore Warriors nungi asayaba mapang lanur asayar yagi asaya tenet nung run 82 yanglur lir aser pai ajak dang run timtiba yanglubaji 33 lir, koba pai Gulbarga Mystics den asayaba mapang yanglua liasü.

Dravid'er jabaso shiba taoba küm stress fracture ka ajanga timtema liasü, pai India nung U-19 domestic asayamung; Vinoo Mankad aser Cooch Behar naprongla nung kanga junga asayaogo.

Vinoo Mankad Trophy nung Samit-i asaya pezü nung run 122 yanglu aser asaya ka nungbo pai run 87 yanglua liasü. Kasa mapang nung Karnataka team-i Cooch Behar Trophy akokba mapang pai batting aser bowling naprongla nung tongtibang shilem agi. Samit-i asaya ti nung run 362 yanglu, kong half



Samit Dravid

century asem densema lir aser paisa wicket 16 agia liasü.

Squads

Australia U-19 den ODI atema India U-19 squad: Rudra Patel (VC), Sahil Parakh, Kartikeya KP, Mohd Amaan (C), Kiran Chormale, Abhigyan Kundu (WK), Harvansh Singh Pangalia (WK), Samit Dravid, Yudhajit Guha, Samarth N, Nikhil Kumar, Chetan Sharma, Hardik Raj, Rohit Rajawat, Mohd Enaan.

Australia U-19 den four-day series atema India U-19 squad: Vaibhav Suryavanshi, Nitya Pandya, Vihan Malhotra (VC), Soham Patwardhan (C), Kartikeya K P, Samit Dravid, Abhigyan Kundu (WK), Harvansh Singh Pangalia (WK), Chetan Sharma, Samarth N, Aditya Rawat, Nikhil Kumar, Anmoljeet Singh, Aditya Singh, Mohd Enaan.

BILEMDANGANG

"Tali bilemloka aoba ajanga shisabulu tentetdaksür."